

(सप्तमोऽध्यायः ॥ वर्गाः 1-27)

(11)

33

(म.4, अनु.4)

ऋषिः वामदेवः गौतमः

छन्दः त्रिष्टुप्

देवता ऋभवः

प्र ऋभुभ्यो दूतमिव् वार्चमिष्य उपस्तिरे श्वैतरीं धेनुमीळे	
ये वार्तजूतास्तरणिभिरेवैः परि द्यां सृद्यो अपसो बभूवुः	॥ 1 ॥
यदारुमक्रंभुभवः पितृभ्यां परिविष्टी वेषणा दुंसनाभिः	
आदिद्वेवानामुप सख्यमायन्धीरासः पुष्टिमवहन्मनायै	॥ 2 ॥
पुनर्ये चक्रुः पितरा युवाना सना यूपैव जरुणा शयाना	
ते वाजो विभ्वाँ ऋभुरिन्द्रवन्तो मधुप्सरसो नोऽवन्तु यज्ञम्	॥ 3 ॥
यत्संवत्समृभवो गामरक्षन्त्यत्संवत्समृभवो मा अर्पिशन्	
यत्संवत्समभरन्भासो अस्यास्ताभिः शमीभिरमृतत्वमाशुः	॥ 4 ॥
ज्येष्ठ आह चमसा द्वा करेति कनीयान्त्रीन्कृणवामेत्याह	
कनिष्ठ आह चतुरस्करेति त्वष्ट ऋभवस्तत्पनयद्वचो वः	॥ 5 ॥
सत्यमूचुर्नर एवा हि चक्रुरनु स्वधामृभवो जग्मुरेताम्	
विभ्राजमानांश्चमसाँ अहेवावेनत्त्वष्टा चतुरो ददृश्वान्	॥ 6 ॥
द्वादश द्यून्यदगौहस्यातिथ्ये रणंभुभवः सुसन्तः	
सुक्षेत्राकृण्वन्ननयन्त सिन्धून्धन्वातिष्ठिन्नोषधीर्निग्रमापः	॥ 7 ॥
रथं ये चक्रुः सुवृत्तं नरेष्ठां ये धेनुं विश्वजुवं विश्वरूपाम्	
त आ तक्षन्त्वृभवो रयिं नः स्ववसः स्वपसः सुहस्ताः	॥ 8 ॥
अपो ह्येषामजुषन्त देवा अभि क्रत्वा मनसा दीध्यानाः	
वाजो देवानामभवत्सुकर्मन्द्रस्य ऋभुक्षा वरुणस्य विभ्वाँ	॥ 9 ॥
ये हरी मेधयोक्था मदन्त इन्द्राय चक्रुः सुयुजा ये अश्वा	
ते रायस्पोषं द्रविणान्यस्मे धत्त ऋभवः क्षेमयन्तो न मित्रम्	॥ 10 ॥
इदाहः पीतिमुत वो मदं धुर्न ऋते श्रान्तस्य सख्याय देवाः	
ते नूनमस्मे ऋभवो वसूनि तृतीयै अस्मिन्सवने दधात	॥ 11 ॥

(11)

34

(म.4, अनु.4)

ऋषिः वामदेवः गौतमः

छन्दः त्रिष्टुप्

देवता ऋभवः

ऋभुर्विभ्वा वाज इन्द्रो नो अच्छेमं यज्ञं रत्नधेयोप यात	
इदा हि वो धिषणा देव्यह्वामधात्पीतिं सं मदा अगमता वः	॥ 1 ॥
विदानासो जन्मनो वाजरत्ना उत ऋतुभिर्ऋभवो मादयध्वम्	
सं वो मदा अगमत् सं पुरंधिः सुवीरामस्मे रयिमेरयध्वम्	॥ 2 ॥

अयं वो यज्ञ ऋभवोऽकारि यमा मनुष्वत्प्रदिवो दधिध्वे	
प्र वोऽच्छा जुजुषाणासो अस्थुरभूत् विश्वे अग्रियोत् वाजाः	॥ 3 ॥
अभूद् वो विधते रत्नधेयमिदा नरो दाशुषे मर्त्याय	
पिबन्त वाजा ऋभवो दुदे वो महि तृतीयं सर्वन् मदाय	॥ 4 ॥
आ वाजा यातोप न ऋभुक्षा महो नरो द्रविणसो गृणानाः	
आ वः पीतयोऽभिपित्वे अहामिमा अस्तं नवस्वइव गमन्	॥ 5 ॥
आ नपातः शवसो यातनोपेमं यज्ञं नमसा हूयमानाः	
सजोषसः सूरयो यस्य च स्थ मध्वः पात रत्नधा इन्द्रवन्तः	॥ 6 ॥
सजोषा इन्द्र वरुणेन सोमं सजोषाः पाहि गिर्वणो मरुद्भिः	
अग्रेपाभिर्ऋतुपाभिः सजोषाः ग्रास्पतीभी रत्नधाभिः सजोषाः	॥ 7 ॥
सजोषस आदित्यैर्मादयध्वं सजोषस ऋभवः पर्वतेभिः	
सजोषसो दैव्येना सवित्रा सजोषसः सिन्धुभी रत्नधेभिः	॥ 8 ॥
ये अश्विना ये पितरा य ऊती धेनुं तत्क्षुर्ऋभवो ये अश्वो	
ये असत्रा य ऋधग्रोदसी ये विभ्वो नरः स्वपत्यानि चक्रुः	॥ 9 ॥
ये गोमन्तं वाजवन्तं सुवीरं रयिं धत्थ वसुमन्तं पुरुक्षुम्	
ते अग्रेपा ऋभवो मन्दसाना अस्मे धत्त ये च रातिं गृणन्ति	॥ 10 ॥
नापाभूत् न वोऽतीतृषामानिःशस्ता ऋभवो यज्ञे अस्मिन्	
समिन्द्रेण मदथ सं मरुद्भिः सं राजभी रत्नधेयाय देवाः	॥ 11 ॥

(9)

35

(म.4, अनु.4)

ऋषिः वामदेवः गौतमः	छन्दः त्रिष्टुप्	देवता ऋभवः
--------------------	------------------	------------

इहोप यात शवसो नपातः सौधन्वना ऋभवो मापं भूत्	
अस्मिन्हि वः सर्वने रत्नधेयं गमन्त्विन्द्रमनु वो मदासः	॥ 1 ॥
आगन्तृभूणामिह रत्नधेयमभूत्सोमस्य सुषुतस्य पीतिः	
सुकृत्यया यत्स्वपस्यया चं एकं विचक्र चमसं चतुर्धा	॥ 2 ॥
व्यकृणोत् चमसं चतुर्धा सखे वि शिक्षेत्यब्रवीत्	
अथैत वाजा अमृतस्य पन्थां गणं देवानामृभवः सुहस्ताः	॥ 3 ॥
किंमयः स्विच्चमस एष आसु यं काव्येन चतुरो विचक्र	
अथा सुनुध्वं सर्वन् मदाय पात ऋभवो मधुनः सोम्यस्य	॥ 4 ॥
शच्याकर्त पितरा युवाना शच्याकर्त चमसं देवपानम्	
शच्या हरी धनुतरावतष्टेन्द्रवाहावृभवो वाजरत्नाः	॥ 5 ॥
यो वः सुनोत्यभिपित्वे अह्नां तीव्रं वाजासुः सर्वन् मदाय	
तस्मै रयिमृभवः सर्ववीरमा तक्षत वृषणो मन्दसानाः	॥ 6 ॥

प्रातः सुतमपिबो हर्यश्च माध्यंदिनं सर्वनं केवलं ते	
समृभुभिः पिबस्व रत्नधेभिः सखीर्याँ इन्द्र चकृषे सुकृत्या	॥ 7 ॥
ये देवासो अभवता सुकृत्या श्येनाइवेदधिं दिवि निषेद	
ते रत्नं धात शवसो नपातः सौधन्वना अभवतामृतासः	॥ 8 ॥
यत्तृतीयं सर्वनं रत्नधेयमकृणुध्वं स्वपस्या सुहस्ताः	
तदृभवः परिषिक्तं व एतत्सं मदेभिरिन्द्रियेभिः पिबध्वम्	॥ 9 ॥

(9)

36

(म.4, अनु.4)

ऋषिः वामदेवः गौतमः

छन्दः जगती 1-8, त्रिष्टुप् 9

देवता ऋभवः

अनुश्वो जातो अनभीशुरुक्थ्योऽं रथस्त्रिचक्रः परि वर्तते रजः	
महत्तद्वो देव्यस्य प्रवाचनं द्यामृभवः पृथिवीं यच्च पुष्यथ	॥ 1 ॥
रथं चे चक्रुः सुवृतं सुचेतसोऽविह्वरन्तं मनसस्परि ध्याया	
ताँ ऊ न्वस्य सर्वनस्य पीतय आ वो वाजा ऋभवो वेदयामसि	॥ 2 ॥
तद्वो वाजा ऋभवः सुप्रवाचनं देवेषु विभ्वो अभवन्महित्वनम्	
जिब्री यत्सन्ता पितरा सनाजुरा पुनर्युवाना चरथाय तक्षथ	॥ 3 ॥
एकं वि चक्र चमसं चतुर्वयं निश्चर्मणो गामरिणीत धीतिभिः	
अथा देवेष्वमृतत्वमानश श्रुष्टी वाजा ऋभवस्तद्व उक्थ्यम्	॥ 4 ॥
ऋभुतो रयिः प्रथमश्रवस्तमो वाजश्रुतासो यमजीजनन्नरः	
विभ्वत्तष्टो विदथेषु प्रवाच्यो यं देवासोऽवथा स विचर्षणिः	॥ 5 ॥
स वाज्यर्वा स ऋषिर्वचस्यया स शूरो अस्ता पृतनासु दुष्टरः	
स रायस्पोषं स सुवीर्यं दधे यं वाजो विभ्वो ऋभवो यमाविषुः	॥ 6 ॥
श्रेष्ठं वः पेशो अधि धायि दर्शतं स्तोमो वाजा ऋभवस्तं जुजुष्टन	
धीरासो हि ष्टा क्वयो विपश्चित्तस्तान्व एना ब्रह्मणा वेदयामसि	॥ 7 ॥
यूयमस्मभ्यं धिषणाभ्यस्परि विद्वांसो विश्वा नर्याणि भोजना	
द्युमन्तं वाजं वृषशुष्ममुत्तममा नो रयिमृभवस्तक्षता वयः	॥ 8 ॥
इह प्रजामिह रयिं रराणा इह श्रवो वीरवत्तक्षता नः	
येन वयं चितयेमात्यन्यान्तं वाजं चित्रमृभवो ददा नः	॥ 9 ॥

(8)

37

(म.4, अनु.4)

ऋषिः वामदेवः गौतमः

छन्दः त्रिष्टुप् 1-4, अनुष्टुप् 5-8

देवता ऋभवः

उप नो वाजा अध्वरमृभुक्षा देवा यात पृथिभिर्देव्यानैः	
यथा यज्ञं मनुषो विक्ष्वाऽसु दधिध्वे रण्वाः सुदिनेष्वह्वाम्	॥ 1 ॥
ते वो हृदे मनसे सन्तु यज्ञा जुष्टासो अद्य घृतनिर्णिजो गुः	
प्र वः सुतासो हरयन्त पूर्णाः क्रत्वे दक्षाय हर्षयन्त पीताः	॥ 2 ॥

त्र्युदायं देवहितं यथा वः स्तोमो वाजा ऋभुक्षणो दुदे वः	
जुह्वे मनुष्वदुपरासु विक्षु युष्मे सचा बृहद्विवेषु सोमम्	3
पीवोअश्वाः शुचद्रथा हि भूतार्यःशिप्रा वाजिनः सुनिष्काः	
इन्द्रस्य सूनो शवसो नपातोऽनु वश्चेत्यग्रियं मदीय	4
ऋभुमृभुक्षणो रयिं वाजे वाजिन्तमं युजम्	
इन्द्रस्वन्तं हवामहे सदासातममृश्विनम्	5
सेद्वभवो यमवथ यूयमिन्द्रश्च मर्त्यम्	
स धीभिरस्तु सर्निता मेधसाता सो अर्वता	6
वि नो वाजा ऋभुक्षणः पथश्चितन यष्टवे	
अस्मभ्यं सूरयः स्तुता विश्वा आशास्तरीषणि	7
तं नो वाजा ऋभुक्षण इन्द्र नासत्या रयिम्	
समश्वं चर्षणिभ्य आ पुरु शस्त मघत्तये	8

(10)

38

(म.4, अनु.4)

ऋषिः वामदेवः गौतमः	छन्दः त्रिष्टुप्	देवता द्यावापृथिवी 1, दधिक्राः 2-10
--------------------	------------------	-------------------------------------

उतो हि वां दात्रा सन्ति पूर्वा या पूरुभ्यस्त्रसदस्युर्नितोशे	
क्षेत्रासां ददथुरुर्वरासां घनं दस्युभ्यो अभिभूतिमुग्रम्	1
उत वाजिनं पुरुनिष्पिध्वानं दधिक्रामु ददथुर्विश्वकृष्टिम्	
ऋजिप्यं श्येनं प्रुषितप्सुमाशुं चर्कृत्यमर्यो नृपतिं न शूरम्	2
यं सीमनु प्रवतैव द्रवन्तं विश्वः पूरुर्मदति हर्षमाणः	
पङ्क्तिर्गृध्र्यन्तं मेधयुं न शूरं रथतुरं वार्तामिव ध्रजन्तम्	3
यः स्मारुन्धानो गध्यां समत्सु सनुतरश्चरति गोषु गच्छन्	
आविर्ऋजीको विदथा निचिक्यत्तिरो अरतिं पर्याप आयोः	4
उत स्मैनं वस्त्रमथिं न तायुमनु क्रोशन्ति क्षितयो भरेषु	
नीचार्यमानं जसुरिं न श्येनं श्रवश्चाच्छा पशुमञ्च यूथम्	5
उत स्मासु प्रथमः सरिष्यन्नि वेवेति श्रेणिभी रथानाम्	
स्रजं कृण्वानो जन्यो न शुभ्वा रेणुं रेरिहत्किरणं ददुश्वान्	6
उत स्य वाजी सहुरिर्ऋतावा शुश्रूषमाणस्तन्वा समर्ये	
तुरं यतीषु तुरयन्नृजिप्योऽधि भ्रुवोः किरते रेणुमृञ्जन्	7
उत स्मास्य तन्यतोरिव द्योर्ऋघायतो अभियुजो भयन्ते	
यदा सहस्रमभि षीमयोधीहुर्वर्तुः स्मा भवति भीम ऋञ्जन्	8
उत स्मास्य पनयन्ति जना जूतिं कृष्टिप्रो अभिभूतिमाशोः	
उतैनमाहुः समिथे वियन्तः परा दधिक्रा असरत्सहस्रैः	9

आ दधिक्राः शवसा पञ्च कृष्टीः सूर्यइव ज्योतिषापस्ततान |  
सहस्रसाः शतसा वाज्यर्वा पृणक्तु मध्वा समिमा वचांसि || 10 ||

(6)

39

(म.4, अनु.4)

ऋषिः वामदेवः गौतमः

छन्दः त्रिष्टुप् 1-5, अनुष्टुप् 6

देवता दधिक्राः

आशुं दधिक्रां तमु नु ष्टवाम दिवस्पृथिव्या उत चर्किराम |  
उच्छन्तीर्माषसः सूदयन्त्वति विश्वानि दुरितानि पर्षन् || 1 ||  
महश्चर्कर्म्यर्वतः क्रतुप्रा दधिक्राव्याः पुरुवारस्य वृष्णाः |  
यं पूरुभ्यो दीदिवांसं नाग्रिं ददथुर्मित्रावरुणा ततुरिम् || 2 ||  
यो अश्वस्य दधिक्राव्या अकारित्समिद्धे अग्रा उषसो व्युष्टौ |  
अनागसं तमदितिः कृणोतु स मित्रेण वरुणेना सजोषाः || 3 ||  
दधिक्राव्या इष ऊर्जा महो यदमन्महि मरुतां नाम भद्रम् |  
स्वस्तये वरुणं मित्रमग्निं हवामह इन्द्रं वज्रबाहुम् || 4 ||  
इन्द्रमिवेदुभये वि ह्वयन्त उदीराणा यज्ञमुपप्रयन्तः |  
दधिक्रामु सूदनं मर्त्याय ददथुर्मित्रावरुणा नो अश्वम् || 5 ||  
दधिक्राव्या अकारिषं जिष्णोरश्वस्य वाजिनः |  
सुरभि नो मुखा कर्त्त्र ण आयूषि तारिषत् || 6 ||

(5)

40

(म.4, अनु.4)

ऋषिः वामदेवः गौतमः

छन्दः त्रिष्टुप् 1, जगती 2-5

देवता दधिक्राः 1-4, सूर्यः 5

दधिक्राव्या इदु नु चर्किराम विश्वा इन्मामुषसः सूदयन्तु |  
अपामग्रेरुषसः सूर्यस्य बृहस्पतैराङ्गिरसस्य जिष्णोः || 1 ||  
सत्वा भरिषो गविषो दुवन्यसच्छ्रवस्यादिष उषसस्तुरण्यसत् |  
सत्यो द्रवो द्रवरः पतङ्गरो दधिक्रावेषमूर्जं स्वर्जनत् || 2 ||  
उत स्मास्य द्रवतस्तुरण्यतः पूर्णं न वेरनु वाति प्रगर्धिनः |  
श्येनस्यैव ध्रजतो अङ्कसं परि दधिक्राव्याः सहोर्जा तरित्रतः || 3 ||  
उत स्य वाजी क्षिपणिं तुरण्यति ग्रीवायां बद्धो अपिकक्ष आसनि |  
क्रतुं दधिक्रा अनु संतवीत्वत्पथामङ्कांस्यन्वापनीफणत् || 4 ||  
हंसः शुचिषद्वसुरन्तरिक्षसद्धोता वेदिषदतिथिदुरोणसत् |  
नृषद्वरसदृतसद्व्योमसदुब्जा गोजा ऋतजा अद्रिजा ऋतम् || 5 ||

(11)

41

(म.4, अनु.4)

ऋषिः वामदेवः गौतमः

छन्दः त्रिष्टुप्

देवता इन्द्रावरुणौ

इन्द्रा को वा वरुणा सुम्रमाप स्तोमो हविष्मां अमृतो न होता |  
यो वां हृदि क्रतुमां अस्मदुक्तः पस्पर्शादिन्द्रावरुणा नमस्वान् || 1 ||

इन्द्रा ह यो वरुणा चक्र आपी देवौ मर्तः सुख्याय प्रयस्वान्	
स हन्ति वृत्रा समिथेषु शत्रूनवोभिर्वा महद्भिः स प्र शृण्वे	॥ 2 ॥
इन्द्रा ह रत्नं वरुणा धेष्टेत्या नृभ्यः शशमानेभ्यस्ता	
यदी सखाया सुख्याय सोमैः सुतेभिः सुप्रयसा मादयैते	॥ 3 ॥
इन्द्रा युवं वरुणा दिद्युर्मस्मिन्नोजिष्ठमुग्रा नि वधिष्टं वज्रम्	
यो नो दुरेवो वृकतिर्दभीतिस्तस्मिन्मिमाथाम्भिभूत्योजः	॥ 4 ॥
इन्द्रा युवं वरुणा भूतमस्या धियः प्रेतारा वृषभेवं धेनोः	
सा नो दुहीयद्यवसेव गृत्वी सहस्रधारा पयसा मही गौः	॥ 5 ॥
तोके हिते तनय उर्वरासु सूरौ दशीके वृषणश्च पौंस्ये	
इन्द्रा नो अत्र वरुणा स्यातामवोभिर्दस्मा परितक्म्यायाम्	॥ 6 ॥
युवामिद्भ्यवसे पूर्व्याय परि प्रभूती गविषः स्वापी	
वृणीमहे सुख्याय प्रियाय शूरा मंहिष्ठा पितरेव शंभू	॥ 7 ॥
ता वां धियोऽवसे वाज्यन्तीराजि न जग्मुर्युव्यूः सुदानू	
श्रिये न गाव उप सोममस्थुरिन्द्रं गिरो वरुणं मे मनीषाः	॥ 8 ॥
इमा इन्द्रं वरुणं मे मनीषा अग्मन्नुप द्रविणमिच्छमानाः	
उपैमस्थुर्जोष्टारइव वस्वो रघ्वीरीव श्रवसो भिक्षमाणाः	॥ 9 ॥
अश्व्यस्य त्मना रथ्यस्य पुष्टेर्नित्यस्य रायः पतयः स्याम	
ता चक्राणा ऊतिभिर्नव्यसीभिरस्मत्रा रायो नियुतः सचन्ताम्	॥ 10 ॥
आ नो बृहन्ता बृहतीभिरूती इन्द्र यातं वरुण वाजसातौ	
यद्विद्यवः पृतनासु प्रक्रीळान्तस्य वां स्याम सनितार आजेः	॥ 11 ॥

(10)

42

(म.4, अनु.4)

ऋषिः त्रसदस्युः पौरुकुत्स्यः

छन्दः त्रिष्टुप्

देवता आत्मा 1-6, इन्द्रावरुणौ 7-10

मम द्विता राष्ट्रं क्षत्रियस्य विश्वायोर्विश्वे अमृता यथा नः	
क्रतुं सचन्ते वरुणस्य देवा राजामि कृष्टेरुपमस्य वत्रेः	॥ 1 ॥
अहं राजा वरुणो मह्यं तान्यसुर्याणि प्रथमा धारयन्त	
क्रतुं सचन्ते वरुणस्य देवा राजामि कृष्टेरुपमस्य वत्रेः	॥ 2 ॥
अहमिन्द्रो वरुणस्ते महित्वोर्वी गभीरे रजसी सुमेके	
त्वष्टैव विश्वा भुवनानि विद्वान्त्समैरयं रोदसी धारयं च	॥ 3 ॥
अहमपो अपिन्वमुक्षमाणा धारयं दिवं सदन ऋतस्य	
ऋतेन पुत्रो अदितेऋतावोत त्रिधातुं प्रथयद्वि भूमं	॥ 4 ॥
मां नरः स्वश्वा वाजयन्तो मां वृताः समरणे हवन्ते	

कृणोम्याजिं मघवाहमिन्द्र इयमिं रेणुमभिभूत्योजाः	॥ 5 ॥
अहं ता विश्वा चकरं नकिर्मा दैव्यं सहो वरते अप्रतीतम्	
यन्मा सोमासो ममदन्यदुक्थोभे भयेते रजसी अपारे	॥ 6 ॥
विदुष्टे विश्वा भुवनानि तस्य ता प्र ब्रवीषि वरुणाय वेधः	
त्वं वृत्राणि शृण्विषे जघन्वान्त्वं वृताँ अरिणा इन्द्र सिन्धून्	॥ 7 ॥
अस्माकमत्र पितरस्त आसन्त्सप्त ऋषयो दौर्गहे बध्यमाने	
त आयजन्त त्रसदस्युमस्या इन्द्रं न वृत्रतुरमर्धदेवम्	॥ 8 ॥
पुरुकुत्सानी हि वामदाशद्भ्येभिरिन्द्रावरुणा नमोभिः	
अथा राजानं त्रसदस्युमस्या वृत्रहणं ददथुरर्धदेवम्	॥ 9 ॥
राया व्यं संस्र्वांसो मदेम हव्येन देवा यवसेन् गावः	
तां धेनुमिन्द्रावरुणा युवं नो विश्वाहा धत्तमनपस्फुरन्तीम्	॥ 10 ॥

(7)

43

(म.4, अनु.4)

ऋषिः पुरुमीळहाजमीळहौ सौहोत्रौ	छन्दः त्रिष्टुप्	देवता अश्विनौ
-------------------------------	------------------	---------------

क उं श्रवत्कतमो यज्ञियानां वन्दारु देवः कतमो जुषाते	
कस्येमां देवीममृतेषु प्रेष्ठां हृदि श्रेषाम सुष्टुतिं सुहव्याम्	॥ 1 ॥
को मृळाति कतम आगमिष्ठो देवानामु कतमः शंभविष्ठः	
रथं कर्माहुर्द्रवदश्वमाशुं यं सूर्यस्य दुहितावृणीत	॥ 2 ॥
मक्षू हि ष्मा गच्छथ ईवतो द्यूनिन्द्रो न शक्तिं परितक्म्यायाम्	
दिव आजाता दिव्या सुपर्णा कया शचीनां भवथुः शचिष्ठा	॥ 3 ॥
का वां भूदुपमातिः कया न आश्विना गमथो हूयमाना	
को वां महश्चित्यजसो अभीक उरुष्यतं माध्वी दस्रा न ऊती	॥ 4 ॥
उरु वां रथुः परि नक्षति द्यामा यत्समुद्रादुभि वर्तते वाम्	
मध्वा माध्वी मधु वां प्रुषायन्यत्सीं वां पृक्षो भुरजन्त पृक्काः	॥ 5 ॥
सिन्धुर्ह वां रसया सिञ्चदश्वान्वृणा वयोऽरुषासुः परि ग्मन्	
तदू षु वामजिरं चेति यानं येन पती भवथुः सूर्यायाः	॥ 6 ॥
इहेह यद्वां समना पपृक्षे सेयमस्मे सुमतिर्वाजरत्ना	
उरुष्यतं जरितारं युवं ह श्रितः कामो नासत्या युवद्रिक्	॥ 7 ॥

(7)

44

(म.4, अनु.4)

ऋषिः पुरुमीळहाजमीळहौ सौहोत्रौ	छन्दः त्रिष्टुप्	देवता अश्विनौ
-------------------------------	------------------	---------------

तं वां रथं व्यमद्या हुवेम पृथुज्रयमश्विना संगतिं गोः	
यः सूर्या वहति वन्धुरायुर्गिर्वाहसं पुरुतमं वसूयुम्	॥ 1 ॥

युवं श्रियमश्विना देवता तां दिवो नपाता वनथः शचीभिः	
युवोर्वपुरभि पृक्षः सचन्ते वहन्ति यत्ककुहासो रथे वाम्	॥ 2 ॥
को वाम्द्या करते रातहव्य ऊतये वा सुतपेयाय वार्कैः	
ऋतस्य वा वनुषे पूर्व्याय नमो येमानो अश्विना ववर्तत्	॥ 3 ॥
हिरण्ययेन पुरुभू रथेनेमं यज्ञं नासत्योप यातम्	
पिबाथ इन्मधुनः सोम्यस्य दधथो रत्नं विधते जनाय	॥ 4 ॥
आ नो यातं दिवो अच्छा पृथिव्या हिरण्ययेन सुवृता रथेन	
मा वामन्ये नि यमन्देव्यन्तः सं यद्वदे नाभिः पूर्व्या वाम्	॥ 5 ॥
नू नो रयिं पुरुवीरं बृहन्तं दस्रा मिमाथामुभयेष्वस्मे	
नरो यद्वामश्विना स्तोममावन्त्सुधस्तुतिमाजमीळहासो अगमन्	॥ 6 ॥
इहेह यद्वामं समना पंपृक्षे सेयमस्मे सुमतिर्वाजरत्ना	
उरुष्यतं जरितारं युवं ह श्रितः कामो नासत्या युवद्रिक्	॥ 7 ॥

(7)

45

(म.4, अनु.4)

ऋषिः वामदेवः गौतमः

छन्दः जगती 1-6, त्रिष्टुप् 7

देवता अश्विनौ

एष स्य भानुरुदियति युज्यते रथः परिज्मा दिवो अस्य सानवि	
पृक्षासो अस्मिन्मिथुना अधि त्रयो दृतिस्तुरीयो मधुनो वि रंषाते	॥ 1 ॥
उद्वामं पृक्षासो मधुमन्त ईरते रथा अश्वास उषसो व्युष्टिषु	
अपोर्णुवन्तस्तम् आ परीवृतं स्वर्णं शुक्रं तन्वन्त आ रजः	॥ 2 ॥
मध्वः पिबतं मधुपेभिरासभिरुत प्रियं मधुने युञ्जाथां रथम्	
आ वर्तनिं मधुना जिन्वथस्पथो दृतिं वहेथे मधुमन्तमश्विना	॥ 3 ॥
हंसासो ये वां मधुमन्तो अस्त्रिधो हिरण्यपर्णा उहुव उषर्बुधः	
उदुप्रुतो मन्दिनो मन्दिनिस्पृशो मध्वो न मक्षः सर्वनानि गच्छथः	॥ 4 ॥
स्वध्वरासो मधुमन्तो अग्रयं उस्त्रा जरन्ते प्रति वस्तोरश्विना	
यन्त्रिक्तहस्तस्तरणिर्विचक्षणः सोमं सुषाव मधुमन्तमद्रिभिः	॥ 5 ॥
आक्रेनिपासो अर्हभिर्दविध्वतः स्वर्णं शुक्रं तन्वन्त आ रजः	
सूरश्चिदश्वान्युयुजान ईयते विश्वां अनु स्वधया चेतथस्पथः	॥ 6 ॥
प्र वामवोचमश्विना धियंधा रथः स्वश्वो अजरो यो अस्ति	
येन सद्यः परि रजांसि याथो हविष्मन्तं तरणिं भोजमच्छ	॥ 7 ॥



(7)

46

(म.4, अनु.5)

ऋषिः वामदेवः गौतमः

छन्दः गायत्री

देवता वायुः 1, इन्द्रवायू 2-7

अग्रं पिबन् मधूनां सुतं वायो दिविष्टिषु	त्वं हि पूर्वपा असि	॥ 1 ॥
शतेना नो अभिष्टिभिर्नियुत्वाँ इन्द्रसारथिः	वायो सुतस्य तृम्पतम्	॥ 2 ॥
आ वां सहस्रं हरय इन्द्रवायू अभि प्रयः	वहन्तु सोमपीतये	॥ 3 ॥
रथं हिरण्यवन्धुरमिन्द्रवायू स्वध्वरम्	आ हि स्थाथो दिविस्पृशम्	॥ 4 ॥
रथेन पृथुपार्जसा दाश्वान्समुप गच्छतम्	इन्द्रवायू इहा गतम्	॥ 5 ॥
इन्द्रवायू अयं सुतस्तं देवेभिः सजोषसा	पिबतं दाशुषो गृहे	॥ 6 ॥
इह प्रयाणमस्तु वामिन्द्रवायू विमोचनम्	इह वां सोमपीतये	॥ 7 ॥

(4)

47

(म.4, अनु.5)

ऋषिः वामदेवः गौतमः

छन्दः अनुष्टुप्

देवता वायुः 1, इन्द्रवायू 2-4

वायो शुक्रो अयामि ते मध्वो अग्रं दिविष्टिषु		
आ याहि सोमपीतये स्पार्हो देव नियुत्वता	॥ 1 ॥	
इन्द्रश्च वायवेषां सोमानां पीतिर्महथः		
युवां हि यन्तीन्द्रवो निम्नमापो न सध्वक्	॥ 2 ॥	
वायुविन्द्रश्च शुष्मिणां सरथं शवसस्पती		
नियुत्वन्ता न ऊतय आ यातं सोमपीतये	॥ 3 ॥	
या वां सन्ति पुरुस्पृहो नियुतो दाशुषे नरा		
अस्मे ता यज्ञवाहसेन्द्रवायू नि यच्छतम्	॥ 4 ॥	

(5)

48

(म.4, अनु.5)

ऋषिः वामदेवः गौतमः

छन्दः अनुष्टुप्

देवता वायुः

विहि होत्रा अवीता विपो न रायो अयः   वायुवा चन्द्रेण रथेन याहि सुतस्य पीतये	॥ 1 ॥
निर्युवाणो अशस्तीनियुत्वाँ इन्द्रसारथिः   वायुवा चन्द्रेण रथेन याहि सुतस्य पीतये	॥ 2 ॥
अनु कृष्णे वसुधिती येमाते विश्वपेशसा   वायुवा चन्द्रेण रथेन याहि सुतस्य पीतये	॥ 3 ॥
वहन्तु त्वा मनोयुजो युक्तासो नवतिर्नव   वायुवा चन्द्रेण रथेन याहि सुतस्य पीतये	॥ 4 ॥
वायो शतं हरीणां युवस्व पोष्याणाम्   उत वां ते सहस्रिणो रथ आ यातु पार्जसा	॥ 5 ॥

(6)

49

(म.4, अनु.5)

ऋषिः वामदेवः गौतमः

छन्दः गायत्री

देवता इन्द्राबृहस्पती

इदं वामास्ये हविः प्रियमिन्द्राबृहस्पती	उक्थं मदश्च शस्यते	॥ 1 ॥
अयं वां परि षिच्यते सोम इन्द्राबृहस्पती	चारुर्मदाय पीतये	॥ 2 ॥
आ न इन्द्राबृहस्पती गृहमिन्द्रश्च गच्छतम्	सोमपा सोमपीतये	॥ 3 ॥

अस्मे इन्द्राबृहस्पती रयिं धत्तं शतृग्विनम्	अश्वान्तं सहस्रिणम्	॥ 4 ॥
इन्द्राबृहस्पती वयं सुते गीर्भिर्हवामहे	अस्य सोमस्य पीतये	॥ 5 ॥
सोममिन्द्राबृहस्पती पिबतं दाशुषो गृहे	मादयेथां तदौकसा	॥ 6 ॥

(11)

50

(म.4, अनु.5)

ऋषिः वामदेवः गौतमः

छन्दः त्रिष्टुप् 1-9,11, जगती 10

देवता बृहस्पतिः 1-9,

इन्द्राबृहस्पती 10-11

यस्तस्तम्भ सहसा वि ज्मो अन्तान्बृहस्पतिस्त्रिषधस्थो रवेण	
तं प्रत्नासु ऋषयो दीर्घानाः पुरो विप्रा दधिरे मन्द्रजिह्वम्	॥ 1 ॥
धुनेतयः सुप्रकेतं मदेन्तो बृहस्पते अभि ये नस्ततस्त्रे	
पृषन्तं सुप्रमदब्धमूर्वं बृहस्पते रक्षतादस्य योनिम्	॥ 2 ॥
बृहस्पते या परमा परावदत् आ तं ऋतस्पृशो नि षेदुः	
तुभ्यं खाता अवता अद्रिदग्धा मध्वः श्रोतन्त्यभितो विरुषाम्	॥ 3 ॥
बृहस्पतिः प्रथमं जायमानो महो ज्योतिषः परमे व्योमन्	
सप्तास्यस्तुविजातो रवेण वि सप्तशिरधमत्तमांसि	॥ 4 ॥
स स्रुष्टुभा स ऋक्ता गुणेन वलं रुरोज फलिगं रवेण	
बृहस्पतिरुस्रिया हव्यसूदः कनिक्रदद्वावशतीरुदाजत्	॥ 5 ॥
एवा पित्रे विश्वदेवाय वृष्णे यज्ञैर्विधेम नमसा हविर्भिः	
बृहस्पते सुप्रजा वीरवन्तो वयं स्याम् पतयो रयीणाम्	॥ 6 ॥
स इद्राजा प्रतिजन्यानि विश्वा शुष्मेण तस्थावभि वीर्येण	
बृहस्पतिं यः सुभृतं बिभर्ति वल्लूयति वन्दते पूर्वभाजम्	॥ 7 ॥
स इत्क्षेति सुधित् ओकसि स्वे तस्मा इळा पिन्वते विश्वदानीम्	
तस्मै विशः स्वयमेवा नमन्ते यस्मिन्ब्रह्मा राजनि पूर्व एति	॥ 8 ॥
अप्रतीतो जयति सं धनानि प्रतिजन्यान्युत या सजन्या	
अवस्यवे यो वरिवः कृणोति ब्रह्मणे राजा तमवन्ति देवाः	॥ 9 ॥
इन्द्रश्च सोमं पिबतं बृहस्पतेऽस्मिन् यज्ञे मन्दसाना वृषण्वसू	
आ वां विशन्त्विन्दवः स्वाभुवोऽस्मे रयिं सर्ववीरं नि यच्छतम्	॥ 10 ॥
बृहस्पत इन्द्र वर्धतं नः सचा सा वां सुमतिभूत्वस्मे	
अविष्टं धियो जिगृतं पुरंधीर्जस्तमर्यो वनुषामरातीः	॥ 11 ॥

| इति तृतीयाष्टके सप्तमोऽध्यायः समाप्तः |